

韓忠獻公遺事
豐清敏公遺事
崔清獻公言行錄



豐清敏公遺事

李朴撰

中華書局

豐清敏公遺事後序

仲尼亟稱於水曰。水哉。水哉。其辭約而旨微矣。而孟子論其所取之意。乃直以原泉混混。不舍晝夜。盈科而後進。放乎四海者。言之。非其深造默識。有以得乎聖人之心。孰能知其所說之如此。而有志之士。欲有爲於此世者。又豈可以不察乎此。而先立其本哉。然自聖賢既遠。道學不明。士大夫不知用心於內。以學立其本。而徒恃其意氣才力之盛。以能有爲於世者。蓋亦多矣。彼其見聞之博。詞令之美。議論之肆。節槩之高。一時之間。從其外而觀之。豈不誠有以過人者。然探其中而責其實。要其久而待其歸。求其充然有以慰滿於人心。而無一瑕之可指者。則什百之中。未見其可以一二數也。嗚呼。若故禮部尙書縉雲清敏公者。其真所謂有本者歟。觀其平居暇日。所以治心養氣。而脩諸身者。蓋天下之物。無足以累其心。是以爲子則孝。爲吏則廉。進而立乎本朝。則上自宗廟。以及人主之身。內自禁掖。近幸之私。而外及乎朝廷卿相之重。知無不言。言無不盡。蓋有當時法家拂士。所爲低回遷就。而詭辭以幸濟者。公獨正色誦言。無少顧避。退未嘗以語乎家。而其計慮之明。諫說之切。所以不諸於時。而卒驗於後者。乃反因深文巧詆之筆。而後顯。及其出而賦政于外。退處于鄉。以至流放轉徙於荒寒寂寞之濱。而遂奄然以歿于世。則其所以處乎巨細顯微之間者。又皆清明純潔。而無一毫之歉。是非所謂原泉混混。而放乎四海者耶。孔子之歎孟氏之言。於是而益見其不我欺矣。熹愚不肖。生長窮鄉。聞公之名。而鄉往之久矣。獨恨未能盡得其行。

事之本末。前年公之曾孫中散大夫誼持節南來。亟往請焉。大夫公乃出是書。而遂以其序見屬。熹不得辭也。因次是說以附于章貢李公跋語之後。雖於公之懿德馴行。剛毅大節。無能有所發明。然使讀公之書。而仰高山。行景行者。知循其本。而用力焉。則亦世道人材之一助。而非獨爲豐氏之私也。大夫公清苦廉直。勤事愛民。屢爲刺史二千石。入居郎省。皆有顯問。然多不得久於其官。蓋有公之風烈云。紹熙二年夏四月戊寅朔。朝散郎直寶文閣權發遣漳州軍州事朱熹序。

豐清敏公遺事

宋 李 朴撰

公諱稷字相之。明州鄞縣人。登嘉祐四年進士第。公始弱冠。以進士求鄉薦。主司以丈夫不屈威武爲賦題。試出同舍生各誦所程文。自矜揚以爲得意。公在下座獨默然。人或易之。強公舉似。公徐誦之。衆聞小賦已愧折。至使秦完壁。高風獨揖於相如。阨虜持旄。壯節自全於蘇武。滿座大驚。衆乃謝曰。君魁薦必矣。徹棘果首冠。始仕主蒙城簿書。詩宋莒公鎮毫。聞公名。屢以問郡寮。衆勉公獻書求知。公終不從。莒公益器重公。亟召置之郡學。俾講授諸生。欲薦之朝。乞召爲直講官。會莒公薨。遂寢。爲襄州穀城令。縣居漢上。號劇邑。富貴豪族聚居。前令鮮能以苞苴自潔。公獨以善政公平稱。曾子固韓持國相繼守襄。皆深奇公。與爲筆研友。不以諸吏待之。時兵部侍郎葉康直宰光化。亦有能名。襄陽人歌之曰。葉光化。豐穀城。清如水。直如衡。持國嘗曰。豐葉二令。他日必皆清近。丁太夫人憂。居喪自毀。幾不能勝杖。而後起。疏食徹味。逮禫除。始復常。安厚卿安撫河北京東。辟爲屬官。同列往往務矜肆。過飭輿馬。凌忽州縣。公獨不爲表襮。每單騎挾以一卒。所至躬見父老。延問疾苦。接官吏盡禮。人皆歎服。厚卿於是益歎重之。使高麗。因以爲書狀官。涉海大風折檣。舟幾覆。衆惶遽莫知所爲。惟公神色怡然。厚卿握公手曰。有諸內者必形諸外。於君見之矣。君未易量也。在選調幾二紀。不求薦章。人鮮知者。自高麗還。厚卿與副使陳子雍睦言諸朝。乃改著作佐郎。改秩。選知封邱縣。縣爲畿邑。若素權要請託。公亦不峻拒。第直其情。取平於法。終不以人爲重輕。

人亦不敢干以私。民吏畏愛之。會御史中丞李資深定薦公可爲臺官。召對。敷奏稱旨。神宗嘉之。且問公曰。卿嘗往高麗。海中風波何以不畏。公對曰。巨浸連天。風濤乃其常。然商舶往來尙絡繹。況仗朝廷威靈。豈復有畏。上又問。卿知佛教。其理如何。對曰。佛者覺也。覺則無所不了。如陛下天縱生知。故能灼見天下之務。其理正如此。上笑曰。卿言是。遇曰。大臣薦卿清脩儉直。宜爲御史。卿退卽有除命。翌日拜太子中允。監察御史裏行。王安禮自潤州召知制誥。公言。安禮守潤所爲不法。及飲宴刁約家。因誘其二婢辱之。淫邪不可侍從。章累上不報。已而安禮遂遷翰林學士。公復言。安禮罪當譴逐。陛下置而不問。今又躡等超擢。實內結近習。不知懷畏。臣言如不用。願黜臣以勵風憲。章復上。上命宰相王文恭公宣諭公曰。安禮事誠聞有之。然朕以其兄安石有功朝廷。今閑居江甯。昨遣其弟安上爲江東監司使。照卹之。乃與孫珪爭論。停廢在家。今若行遣安禮。恐無人照管。安石朕當戒約之。如不悛改。當如卿所奏。祀神州地。祇公爲監祭。言獻官賀某昏耄跛倚。非盡敬意。且某除守華州。觀其老甚。必不能當承宣之寄。願令歸老。某以宮祠罷。王文恭公子仲煜。以姦污爲有司所劾。公言。王珪備位元宰。不能肅正閭門。使其子所爲若是。何以糾正百官。宜從罷免。章惇參知政事。御史朱服言其與周之道請託事。詔公劾實。公分別是非。論列曲直。不爲子厚地。惇坐出。知陳州。吳安世以賄濫得罪。公言。本路監司葉義叟。孫昌齡。胡宗師。朱明之等。嘗論薦安世再任。蓋安世宰相吳充之姪。義叟等意懷阿附。以汚爲清。以偏爲平。何嘗指盜跖爲伯夷。乞併按其罪。公爲御史三年。彈劾不避權要。神宗嘗謂諫官舒亶曰。豐稷論事最誠實。公益感勵。執政忌

之會高選館職。遂徙公著作佐郎。在館逾年。遷吏部員外郎。時王安禮方爲右丞。公嘗搏擊之。引嫌自列。詔不許。章三上。乃罷新命。提點利州路刑獄。公在利路。會軍賊王冲。規略商號金洋間。有旨陝西與利路京西提刑。督捕盜官擒捉。久未獲。詔促限愈急。公躬率巡尉。扼截險要。至踰時不歸。廨舍冲與其黨欲度漢中。而公以兵阻隘。卒不得西。遂爲險軍所擒。哲宗卽位。徙成都府路提點刑獄。西蜀繁富。風俗華侈。摸石樂市等會。士女駢集。競爲奢僭。帥守監司往往勉徇其俗。謂不如是必召亂。公至。適冲元爲帥。章質夫孫亞夫皆爲漕。俱以簡儉稱。一時會遇。燈火蕭然。蜀人歎服。其俗頓革。爭寫爲圖畫。以爲宴集奢侈之戒。按刑兩路。於刑讞尤盡心。所平反疑百餘人。察視屬吏。清濁必辨。召爲工部員外郎。未踰月。用中丞胡簡脩。公宗愈。侍御史王明叟。覲薦。復爲殿中侍御史。蘇子由當制。有曰。有德者必有言。爾頃爲御史。直諒不私人。以爲公論。公疏言。陛下明足以燭萬事之統。而不可用其明。智足以應變曲當。而不可用其智。願考古道。二帝所以聖。儀式刑文王之典。成王所以賢。偏聽生姦。獨任成亂。此古今之大患。帝王之深戒也。願陛下以洪範爲元龜。祖訓爲寶鑑。一動於深宮之中。思所以爲則於四海之內。一言於細旃之上。思所以爲法於千載之下。則教化自行。習俗自美。中國既安。四夷誠服矣。夏國主秉常死。詔遣起居郎劉仲馮奉世爲冊使。立其子乾順。會宣仁垂簾。坤成節上壽。而乾順違故事。不遣使者。仲馮遂出境。公劾仲馮。且言。昔元昊嗣立。楊告爲旌節使。元昊初設席。自尊大告遷坐。就賓位以抗之。終不少屈。後郭勸爲起復使。所遣百萬悉拒不受。逮慶歷中。內款自新。及諒祚立。朝廷遣冊命。而夏人方圍慶陽。知延州程琳止詔使於

鄆州曰夷狄貪此可緩慶陽之難矣。乃具禮幣賜予之數。移報之。果喜而迎冊使。且解圍而去。今誕聖之節。萬方來賀。乾順輒失臣禮。奉世徒利其賂遺。不顧國家大體。擅入其國。宜按其罪。章數上。未報。會公遷右司諫。表辭。因言兩對清光之下。具彈冊使之非云云。而仲馮遂以贖論。荆王楊王。當元祐初。尊寵莫與比隆。嘗令成都府路走馬承受。造錦地衣。公以白中憲。請率臺諫言之。中憲狐疑未決。公即獨奏劾。以謂二聖節儉樸素。欲以化天下。而近屬奢侈僭靡至如此。官吏輒奉承。宜糾正其罪以示人。奏對敷陳不已。在廷皆悚息。及出殿門。監察御史趙凱時與公同進對。退謂公曰。聞君言。使某汗流浹背。給事中趙君錫曰。諫官如是。天下何患不太平。不數日。改國子司業。遷司業。一日。薦京西三學官。潁州教授陳師道。穎昌教授鄭浩。蔡州教授晁說之。無不稱伏。呂申公時爲相。公往謝申公。申公素寡語言。謂公曰。惟寡慾可與言道。居典冑三歲不遷。會右史闕。執政進擬。皆未允。詔以公爲起居舍人。中外大慙。哲宗御邇英講罷。以御書徧賜講讀官。因賜左右史。特書杜甫登善福寺閣詩以賜公。中書舍人鄭雍使契丹。命公攝其職。數月。絲綸所播。天下傳誦。以爲得西漢體。御史中丞趙君錫等疏言。近日制詞。惟豐稷有古體。公爲右史。踰半歲。將以次遷西掖。會王安禮守成都。以奢縱被譴。執政有不悅和甫者。以公爲御史。時嘗極彈之。乃候公入。直降制。公務大體。薄其罪。當路不喜。譏謂公昔嘗言安禮。今反顧望。能爲太常少卿。公力辭。乞補外。章六上。頓起。謂公曰。盡受命。士將以好名議公。公曰。士顧所行當否。不當避名。會趙君錫等疏開。當路亦悔之。公爲少常兩月。執政悔用公。不盡其材。乃遷公爲國子祭酒。時士久以浮靡虛誕相高。自公爲司業。

誘誨斥黜必當其實。所獎與者。若馬涓。張庭堅之徒。已服衆望。頃之。二人聯中甲科。士益以公爲知人。洎長學省。庠序之士踰三千。莫不望風慕嚮。國子監西門稍僻。閒有潛出者。皆由於此。前是長貳杜關以防。猶不能止。及公命關門。撤去詭伺。而士莫敢出。呂丞相大防聞之。歎曰。士可以德服。不可以法制。如豐相之可謂以德服人也。元祐六年冬。享廟禮畢。詔用近臣言。回駕視學。奠謁先聖。因命公講。尙書無逸。講畢致謝。上宣答。卿問學該博。多所發揮。面賜三品服。翌日。詔兼侍講。儒者榮之。權刑部侍郎。公素以儒學聞。法吏頗易之。及掌邦禁。執丹筆。細大必盡其情。而靡不嘗於律。以舞文自任者。大畏之。方春苦寒雪。公疏言厥罰異常。自二聖臨御。朝廷清明。未嘗私一喜怒。以進退大臣。未嘗偏一愛憎。以榮辱多士。無煩徭暴政。淫刑濫罰。雖堯舜用心。無以尙茲。何嘉祥未臻。而沴氣斯見邪。豈應天之實未充。事天之禮未備。畏天之誠未至歟。豈宮掖之臣有關預政事。如天聖中任羅崇勳。江德明等。訪外事。以致中外有危疑之心乎。豈同治平初。有任守忠。詭謀離間兩宮。而史昭錫王士安之徒。肆姦惡以駭衆聽乎。天道聰明。苟無其事。變不虛生。若不畏懼。有以消復。而輕怠簡諛。則凶變必至。願陛下開廣聖德。祇畏天心。延問名臣。思求其故。總正萬事。保合太和。任賢責成。而不受浸潤之譖。惠民以實。而不尙姑息之政。言如春陽之溫而不暴。動如祥風之扇而不急。六宮和於內。百官和於朝。萬民和於下。則天地之和應。而災沴消矣。館伴契丹。遂爲正旦。或作生辰國信使。虜中接伴劉霽。六符之孫蓋在其國。以名臣稱。見公深加歎服。時宣仁稱制。兩宮偕遣使同行者四人。管館舍坐久焚香。霽起曰。此香特爲公設也。虜中故事。使者有射弓之宴。公素未嘗持弧矢。

及常宴引弓一發中的。虜人相顧歎服。副使郝某退謂公曰。某世幃門。非不習此。今日見公中的。實非素揣。公謝曰。此朝廷威靈使然也。哲宗親政。詔外任內侍樂士宣等入內。寄資供職。公言陛下初聽萬機。宜登進忠良以輔聖德。今未聞有所拔擢。而首召士宣等。傷美德於天下。臣切惜之。望留神大禹戒舜之言。若稽仁祖聽治之意。令士宣等各歸本任。仲虺稱湯曰。改過不吝。故能聖欽日躋。爲百世之盛王。惟陛下裁擇。在刑部。幾再歲。故事。權侍郎二週歲遷待制。公累章乞補外官。上不從。至十餘上。執政謂公胡不少留以應格選。公但遜謝。而乞外愈力。遂以集賢知潁州。自潁而知江甯府。過闕入覲。擢龍圖待知廣州。陛辭。上宣諭云。已除卿吏部侍郎。出自朕意。不許辭免。詔以待制守侍郎。公辭曰。朝廷昨降臣廣東。加以茲職。今既改新命。義不當兼。詔不許。章三上。從之。優詔褒答。其辭甚寵。執政方力排垂簾事。縉紳貶斥者數十人。公亦在睚眦閒。而公中立不倚。每正色論議。不少徇從。常路亦不悅。公復丐外。上深惜其去。而公懇求不可奪。乃以待制留守西郡。西洛居守皆貴近。大抵務簡略民事。公獨盡心焉。太師文潞公嘗曰。吾閩洛守多矣。未有如公能留心小民利病者也。且曰。公所爲甚似趙閱道與李及。自洛徙鄆。未至。復守洛。已而改帥真定。時執政起邊釁。上方議進取。公謝章有曰。偃兵護塞。敢忘師帥之能。生事邀功。終匪朝廷之利。執政見之。大不說。會都鈴轄張某。素以苛暴虐士卒。衆積憾。謀因大閱教陣射殺之前一日。公廉知其狀。祕不發。卽爲檄。俾張出按屬州營壘。且督其卽去。張莫知其故。頗訝公不得已遂行。士卒謀不果發。張乃訴公於朝。謂公無罪。摺拾有詔驗實。公始具其事以聞。詔徙張京東。公猶移帥許昌。不踰月。改南都。南

都地當舟車之衝。例飭劇傳以說往來。雖居守皆貴近。然稍忽。是輒飛謗。公至。自故事常迎餞外。一切置之。人亦莫能怨也。上數欲召公還。而大臣素不喜。更徙西京。未幾復守南都。以眩疾丐知湖州。詔從之。幾歲。改知杭州。在杭凡三年。杭爲東南會府。民物繁富。甲天下。風俗以侈靡自尚。公素以簡儉恬靜稱。始至。吏輩以爲公必革奢費。過爲削弱。以取稟。公徐度其宜。裁以中制。民訟至庭。辨析毫釐。聽斷明審。吏不能欺。錢塘人至今誦說其政。官遊江閩者。多自杭乘舟還。朝常不下數百員。類先權要請託者得之。以故寒士卑官。淹久終不能得。公命以投牒日爲先後。不問高下。遣之士大夫悅服。公厭治劇。數丐宮祠。不許。又求守溫明。優詔不從。徽宗卽位。首召公爲左諫議大夫。先是李清臣除門下侍郎。薦公自代。未幾遂召。或謂公嘗貳天官。久歷藩鎮。今召以諫坡。似下遷。韓丞相曰。昔神宗召趙抃自成都府還。將大用之。故事當更省府。乃但以閣學士知諫院。諭大臣曰。用趙抃爲諫官。賴其言爾。苟欲用之何傷。已而果參大政。今上召相之以諫坡。正用此故事。卽欲大用故也。未至闕。改御史中丞。入對言。邢恕貶辭。不應如此。司馬光呂公著皆賢臣。直臣不當以爲有罪。上云。變改神宗法度如何。公曰。當改。上怒目而送之。召爲哲宗山陵儀仗使。靈駕至鄭道途泥淖。行頗不便。山陵使章惇欲斬力士。收鄭官吏下獄。公止之不可。遂劾奏。章惇素擅朝權。天下憤怒。今又遷怒戮人。怙勢作威。云云。還朝。累章疏其姦。章乃得罪。蔡京及其弟卞在朝廷久植黨自固。及上卽位。臺諫交疏其姦。未報。蔡與公素無舊怨。公入朝。上未臨御。閒蔡越次揖公曰。天子自外服召公還中司。今日首對。必有高論。公答曰。方觀聖君。不敢以細事開行。自知之晚。乃彈蔡公。章出。蔡

深憾之。既而陳瓊江公望何昌言等皆力言未動。公語殿院陳師錫等曰：「明日蔡公不出，吾屬何面目以對臺吏？」乃自草章，率寮屬對揚，其疏其姦邪狀曰：「京卞兄弟同惡，迷國誤朝，爲患甚大。卞雖去位，假京然在職，卑污失已，無所不至。外結后族，內事閹人，以固其寵。若果大用，上下治亂自此分矣。祖宗基業自此墮矣。忠臣寒心，良士痛骨。臣非自愛而憂，蓋爲陛下憂。爲天下賢人君子憂。章四上，上宣諭曰：「朕固欲行卿當更奏東朝。」公退，奏書欽聖，其疏其姦，不數日，京遂貶出。公數言：「宣仁聖烈皇后佐佑哲宗，垂簾聽政，多退緹小人，泊復進用，遂造爲誣謗。今宜辨明。」初上章，蔡京尙未罷，嘗諷公曰：「張寂明正坐言宣仁事，卽自罷。」意欲以此動公。公徐曰：「宣仁有大功於天下，久爲姦邪所誣，稷備位風憲，豈可緘默而不爲辨明？此大事也。雖遠斥所不恨。」又疏曰：「哲宗皇帝親政，召章惇爲宰相，不能以道事君，用羣小合姦，謀害元祐忠賢，司馬光呂公著等以變亂神考法度，謂之不忠，不能紹述，謂之不孝，以此激怒先朝，此乃王曾對仁祖所謂儉人惑上之言也。惇以光等變亂法度，不足爲深罪，又編類臣寮章疏，擇其切直不諱之言，與夫陳亂世以諷今者，謂之誦上，謂之指斥，又以言語不足爲大惡，乃持文及甫邢恕之私言，輒誣光等謀廢立爲不軌。按惇當國七年，竊持威柄，禍福天下，勇於害賢，敢於殺人，臨大變，計大事，包藏陰謀，發爲異議，陛下尙優容之乎？祖宗怒之久矣。今付陛下震之上帝，怒之久矣。今命陛下誅之。陛下何憚而不果耶？」又言責授武昌軍節度副使章惇，昔在相位，變亂名實，顛倒是非，拔擢羣小，布列中外，大明繼照，羣陰廓開，俊傑彙征，姦回竄伏。安惇塞序辰，放歸田里。呂嘉問、路昌衡、分司外地。范鏜、張商英、吳居厚、落職降知小州。

惟林希、徐鐸、葉祖洽，未見施行。希助惇爲惡，布在王言，掩宣仁聽政之明，蔽永泰知人之鑑。鐸編類章疏，隨惇好惡爲之重輕，存沒名臣，橫遭貶竄。祖洽觀望惇意，欲擅元豐之末命，輕奏王珪圖危正統，議罪麗罰，宜不在安惇蹇序辰之下。又言史官脩神宗實錄，僅二十年，輒以王安石家日錄亂之，置而不問。脩哲宗實錄，事未類筆，未下議，詔徒爲謗，害於後世，而相與依違不決如此，則何以取信於天下？願選擇史官，申飭成書。公自建中靖國初入朝，論列獻替不一，又數言近習之非，權貴已不喜。會除錢遹爲殿中侍御史，公言遹回邪不可任，風憲乞用陳師錫，如必用遹，臣請先罷。詔出遹湖北提舉，除陳師錫殿中侍御史。諫官陳瓘以言事貶，公使子弟出城慰勞之，且厚贐其行。黃策上封章論瑤華事，不報。公復繳入，乞施行。由是朝廷有意罷公矣。一日，聞鎖學士院，公謂臺屬曰：「此必和曾子宣，盡其論之。」具章未上，先罷公爲工部尙書。乃宣麻相曾布既降告，上命加兼侍讀，公力辭不受。乞明越一郡，章五上，三降詔，上親諭之。乃受命。其謝章云：「壯哉汲黯，坐寢淮南之謀，美矣魏公，沒爲唐室之鑑。內侍已成於怨府，豈不思危？佞人方剗於言章，俄聞報罷。上曰：佞人謂誰？對曰：臣謂佞人爲曾布。陛下斥之外郡，則天下事定矣。禮製局大裘成，議以金匱貯之，公力諫不已。一日，上問陸佃：大裘匣用金纔四百兩，此祀天之服，恐不當較。佃曰：郊服大裘以尚質也，非惜金，但不當用爾。上曰：既如是，不作匣可也。豐稷煎燭不可過矣。既退，諸公皆歎息公之守官。上之從諫，佃謂李邦直曰：「使此等人在經筵，人主豈復有過邪？」呂原明建中靖國間爲祕書少監，時曾布不樂其在朝，諷侍御史陳次升言之，以爲資淺望輕。左遷爲光祿少卿。時公初除禮部尙書，大不

平之。卽薦以自代。薦辭云。具官呂希哲。心與道潛。浩然淵靜。所居則躁人化。開風則薄夫悛。建中靖國元年。方議哲宗配享功臣。公爲禮部尙書。欲以申公司馬文正配享。草奏未就。呂原明聞之。使萊公見公云。二公先朝被罪。官爵尙未復盡。今遽請配享。恐致議論。公正色云。五王之配享中宗。何嘗不得罪。但有功於宗社。則宜享矣。於是立入奏。竟爲會布所沮。不行。不旋踵。公遂罷。遷禮部尙書。宦官朱用臣卒。賜諡甚美。公不書其敕。奏疏駁論用臣姦邪。交結中外。不當賜此諡。公雖罷言職。以在經筵。每遇講讀。當進書。輒言天下事。至君子小人之際。必反覆究切。爲上言之。公言人主自用。則近習悅。人主自聖。則諛臣進。祖宗艱難之大業。天下生靈之休戚繫焉。聖慮可斯須忘直言正諫乎。又言元豐中。王師覆於永洛。神宗泣諭宰臣。悔不用呂公著言。今後輕議用兵。與卿等刻骨爲戒。今河湟羌種未甯。臣願下沛然之詔。許其自新。不置漢官。不留戍兵。令自擇其酋長。朝廷從而命之。則所損者遠略之虛名。所存者初政之仁德。可以光昭先帝戒用兵之聖訓。後遂以董氈爲河西節度使。又言唐太宗時。魏證引齊威公以無忘在莒之論。從而警戒之。蓋富貴之移人也。多忘其初。臣願陛下無忘龍德宮時。則聖德日躋。享天遐福。又言陛下以建中靖國紀年。聖人之心。顯於名實之中。則號令信於天下。臣願陛下尊賢納諫。舍己從人。夫是之謂建中。近習不敢爭爲奇技淫巧。侵玷恭儉之化。近戚不敢干預政事。招權市恩。夫是之謂靖國。體元謹始之道。無以尙茲。織錦緣官。麗爲地衣。公言臣聞仁宗衾褥用黃紵。服御用縑繒。嘗曰。朕宮中自奉。止於如此。祖宗家法。粲如日星。自古帝王踐祚之初。未有不以節用愛民。爲宗廟社稷之永圖。奈何奢侈之端。生於

微而不自知及侈心一動窮天下之欲不足爲其樂則政事荒紀綱亂天下之勢利去矣詔罷之又言陛下卽位未久施德日淺建宮以甯神營寺以崇孝復置御前生活所以供內庭之用外議不曉聖意竊謂陛下好脩造尙華侈輕費用不惜民力臣願陛下約己以養天福愛民以永天壽又言難益者人之方寸之地耳費不期驕而驕自至富不期侈而侈自生陛下初履帝位罷遷卒減苑作禁鑲金休工役德意布於四海和氣生於天地年穀順成幾徧天下臣願陛下厲精爲政崇儉愛民不移踐祚之初心則宗廟社稷萬世無疆之福又言姚崇勸天子不求邊功宋璟不肯賞邊臣而天寶之亂卒蹈其害臣恭惟先帝在御十有九年制生財之法以同民利以實國用紹聖元符中匪人用事興起邊患倉府耗蕩百姓餓殍斥堠雖遠飛芻輓粟以贍戍兵坐困中國勢不久支仰賴聖心節用於內息勞於外必先仁覆天下使人心和樂天地休應年穀屢豐方能釐補瘡痍庶幾平治中夏旣又遠人自服安用進兵耀武以經遠略神考以用兵爲刻骨深戒願陛下敬而守之任崇瓊之賢而不求邊功去惇卞之邪而不窮民力太平之基業實在於此洛水溢壞隄舍去應天禪院六聖神御殿百餘步公言萬一三川暴溢甯無昏墊之虞乎有司會上朝廷賜度牒以修而移爲他用願以禁錢作一大坊以衛祖宗萬世之靈從之又言堯舜之世衆賢和於朝萬物和於野無他道焉內君子外小人故也爲人上者體堯舜必先以是潛於心而戒多欲委任正人不以浮言搖動則讒毀之路塞而朋比之風暗然自消王道平朝廷尊草茅賤臣皆得竭忠以聞況賢在位能在職乎又言大臣與國同體任之不疑則心德惟一天下可合謀而治讒閒無自而至矣比

有議者謂臺諫官爲天子耳目。選自朝廷。則爲大臣耳目矣。故諫官不歸於國論。御史不歸於憲府。祖宗法制。格而不行。先入之言。豈無唐陳師合之意乎。又言。治世多君子。未嘗無小人。亂世多小人。未嘗無君子。人主建大中之道。以靖人心。明乎安危之幾。取舍之道而已。若使君子小人雜處於朝。必消泰而爲否。否。西京會聖宮。奉安哲宗神御。詔公與入內都知馮經相視。時經方用事。及偕被命。人意公必相。惟結自往。及還朝。幾兩月。除議職事外。未嘗有一語。經數因事稱譽。公輒正色不答。經歎謂人曰。豐公眞清直近臣也。公自洛使還。上眷注意厚。執政虛位。縉紳謂公當遷。而公數論事。與權近忤。大臣無爲公地者。小人与讒之。遂力請外補。韓丞相忠彥顧同列曰。昔孔溫業不樂在朝。宰相相謂可以少警。孔吏部不樂居朝。今相之亦苦求去。吾輩甯不愧前人乎。公以議論不合。堅欲出。竟以樞密直學士知蘇州。自後論公引去益多。朝士朱肱以書抵權臣。謂如公輩。非若鳬鴈去來。不足爲江湖多少。其出入係人望。豈可使皆補外乎。謁告焚黃至鄉里。屏簡騎從。入見守令。必坐客次。守令驚愕出迎。公曰。桑梓禮然也。見鄉人雖田夫農父。接之笑語。飲食無少間。改守越。適歲蝗。穀價騰踊。民病食。公發廩賑之。寮屬苦禱待報。公曰。俟得請。民固飢死矣。某身任之。諸君無累焉。分命屬官爲十數所。減市價五之二。使民各從其居便近。隨老少。日各執歷就糴。一二日。公輒親往按視勞問。主者衆。是以皆爲盡力。民賴以濟。徐果上書自劾。詔原之。崇甯初。蔡京復得政。既憾公斥已。而其黨相與出力。詆公無所不至。言公元符末。召爲左諫議大夫。辭免劄子。引孝經天子有爭臣七人。雖無道不失其天下。夫人主宅崇高富貴之極。心易放逸。必先選正人置諸左。

右雖有無道之心。終不爲桀紂惡德。自取敗亡。此其意在譏切先帝。坐降職知明州。故責辭曰。爾項繇元祐致位近班。秦陵察其用心。屏居外服。朕在位之始。選推不次。中司八座。靡不踐更。而進對之間。首倡異論。以善政良法爲可改廢。以附會姦黨爲時忠賢。變亂是非。深駭聽聞。時有大星殞于庭。俄有是命。越民攀望公舟。老幼滿道。號呼曰。奈何奪吾父乎。又言公嘗言諫議大夫以諫爭規。諷爲職。不爲容悅逢君之惡。不懷親望。陰害忠良。不以聲色爲常事。醉上心。不以淫巧爲末務。蕩上意。信如稷言。則先朝以諫爭規。諷爲職者。嘗爲容悅逢君之惡矣。嘗懷親望。陰害忠良矣。嘗以聲色爲常事。醉上心矣。嘗以淫巧爲末務。蕩上意矣。如此等語言。豈宜上達朝廷。流傳四方。至章奏宰相章惇。變亂名實。顛倒是非。拔擢羣小。布列中外。陰邪慘酷。更相唱和。毒流四方。感動天變。此尤詆誣之甚者也。臣嘗以詩書所載考之。小人在位。毒逋四海。日月薄蝕。天地災變。乃商周季世之事。豈有席祖宗積累之休。膺美成在久之運。而遽有是耶。職知常州。故責詞曰。朕初纂服。首爲言官。累有封章。語涉譏誣云。又言公元符之末。召爲言官。譏謗先帝。公論爲之不平。未至常州。貶海州團練副使。睦州安置。道州別駕。台州安置。又言公在元祐時用事。紹聖中行遣最輕。在元符初。首爲言官。倡導姦謀。殊無忌憚。封章皆有意譏謗先帝。臣子不忍道其言辭。遂除名。徙建州。公被謫。攜孫姪一二人。與居佛寺。怡然自得。日與衲子輩遊。賓客一時杜絕。郡使者郡守往往皆門生故吏。踵門請謁。終謝不見。燕坐閱華嚴合論。抄其要爲百卷。每遇天雷節。自謂雖散官流徙。昔嘗居禁從。必出金。就僧寺營佛事一月。躬詣焚香。逮罷散。率孫輩已仕者。皆就拜具疏。以伸天保之報。居三